



La Rumantschia dovra meds da massa en rumantsch. Quai è impurtant per l'identificaziun cun il rumantsch e ses svilup permanent. Auters formats da meds da massa sco la «Posta Ladina» mussan dentant ch'i pon funcziunar senza pli grond sustegn. A La Quotidiana reussiva quai er ina giada. Oz ha ella la mesadad dals abunnents en cumparegliaziun cun ses megliers temps. Avant che subvenziunar ina gasetta d'in editur privat èsi d'enconuscher ils motivs pertge ch'ella na po betg esser la gasetta per tuttas e tuts Rumantschs e pertge ch'il dumber d'abunnents sa diminuescha cuntinuadamain. La Quotidiana aveva deplorablamain gia avant otg onns ils medems problems cun la consequenza che l'Agentura da novitads procura dapi lura la gronda part da LQ cun producir ina buna part dals cuntegns. I sto e vegn era questa giada a dar ina soluziun per las difficultads da LQ. Simplamain dar raps publics è dentant mo ina da pliras opziuns e forsa gnanc la meglra.

***Tge ideas e visiuns avais Vos pia per las medias rumantschas en l'avegnir?***

En quest connex datti dus champs da ponderar: Il format da medias e la producziun da cuntegns schurnalistics.

Per realisar en il futur in bun format da medias èsi da coordinar (p. ex. tranter RTR ed anr) ina purschida da meds da massa quotidians online ch'è gratuita. Or da quests artigels quotidians po lura mintga format che chatta ses lecturs stgaffir p. ex. ina gasetta emnila u pli frequenta cun s'aprofundar pli ferm en singuls artigels che valan la paina per in schurnalissem investigativ. Online èsi uschia pussaivel da consumar medias quotidianamain. Per artigels dentant cun dapli substantza ha mintgina e mintgin «sia gasetta», forsa mo regionala u sco part d'in format biling u en ina gasetta tudestga, nua ch'ella ed el po intervegnir sur da fatgs pli profunds. Ils artigels online ston lura sa chapescha far attent en tge format che quest artigel vegn a cumparair cun dapli charn vi dal oss.

Areguard la producziun da cuntegns schurnalistics: Tranter 120 e 150 schurnalistas e schurnalists produceschan en las differentas organisaziuns sco RTR, anr, LQ, PdS, PL etc. medias rumantschas. Questas cumpetenzas e producziuns da cuntegns èn da chanelisar ed organisar uschia ch'igl è pussaivel da profitar da sinergias per tuts.

***Vus bandunais uss in'instituziun culturala per surpigliar la responsabladad per la Fundaziun Flury sin il sectur da la sanadad e vegliadetgna. Resta Urs Cadruvi vinavant attaschè a la cultura, per exempel danovamain sco dirigent d'ina Brass Band?***

Temp per surpigliar ina furmaziun da brass permanentamain na vegn jau deplorablamain era betg ad avair en il futur. Jau vegn dentant a cuntinuar cun quai ch'jau hai era fatg durant mia lavur tar la LR. E quai è da preparar musicas sin concorrenzas e concerts durant champs intensivs da trenament.

***Vus essas commember da la Partida liberala dal Grischun ed avais gia candidà per il cussegl naziunal. N'exclauda Urs Cadruvi pia era betg ina carriera politica?***

Carriera politica n'è betg e n'è mai stà in plan primar da mai. Excluder n'exclud jau dentant nagut

***Vus bandunais la fin da matg la Lia Rumantscha. Tge cussegls dais Vos a Voss successur Martin Gabriel?***

Avair ina buna ureglia per ses conturn, dentant da tadlar sin sia vusch interna.